

**Date – 02/05/2026**

**Time - 18:30 -18:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. Mizorama eirawngbawlna gas pechhuaktu ten eirawngbawlna gas renchem kawngah tan lak chhoh zel a ngai an ti.
2. Cheng vaibelchhe khat leh nuai 74 hu ruihhlo an mankhawm te tukin khan Central YMA Hall-ah hal ral a ni.
3. Election Commission thupek angin vawiin khan West Bengal-a Polling Station 15 ah vote thlak that a ni
4. Lok Sabha Speaker Om Birla chuan vawiin khan kum 2026-27 chhunga Parliamentary Committee tur a din

<><><>

**LPG**

Mizoram RGGLV Distributor Association President Pu Vanlalvuta Chinzah chuan eirawngbawlna gas renchem kawngah hmalak tan lak chhoh zel a ngai a ti.

Tunhnaia sorkar laipuiin commercial gas bur man a tihsan chungchanga Akashvani News in kawmnaah he thu hi sawiin Pu Vanlalvuta Chinzah chuan eirawngbawlna gas bur lian chi, commercial cylinder chu thla hmasa ni 1-ah cheng 2,573 man niin tun thla ni 1 atangin cheng 3,567 man a nih thu a sawi a. Bur khat man chu cheng 994 in a to ta tih sawiin heti hian kg 1 zelah cheng 52.03 in a to belh a. Hei hi a chhan bulpui ber chu Iran leh USA inkara buaina avanga khawvel pumpuia oil leh gas supply buai vang a ni a ti.

Pu Vanlalvuta Chinzah chuan buaina chinfel a nih loh avangin gas a harsa chho tih sawiin chuti chung chuan sorkarin theihtawp a chhuah a ti a. A bur lian man chauh ti toin eirawngbawlna gas bur pangngai, domestic cylinder man bik chu mitin mamawh a nih avangin a la ti to lo tih a sawi a ni.

**Byte of Vanlalvuta Chinzah**

Pu Vanlalvuta chuan Mizoram eirawngbawlna gas supply chu a harsa tan tawh a ti a. Mahni hminga connection nei lo, mahni ina hmang ve tho si te'n a hma chuan gas an la ve thei mai thin a, tunah chuan an la thei tawh lo a, an buai hle tawh a ni a ti.

Eirawngbawlna gas chu In tinin bur 2 aia tam bur an kawl tlangpui avangin khawlkhawmin eng emaw chen a la veng ni a hriat a ni a ti a. Heng khawlkhawm sa te hi mipuiten an hmang zo tan tih sawiin tun ang renga a kal chuan May thla tawp lamah chuan mipuite an buai chhoh mai a rinawm a. Tunah hian eirawngbawlna gas

supply chu khaihlak angin langlo mahse a tak takah chuan a muang chho hle niin a sawi baw k a ni.



## **HOME MINISTER**

Home Minister Pu K. Sapdanga'n tunhnaiah Mizote sorkar laipui hnaa lut an tlem hle tih sawiin tan tlan a ngai takzet tih a sawi.

Vawiina Aizawl Electric Veng YMA hall-a Electric Veng Branch YMA Literature & Education Sub-Committee te buatsaih 'Career Fair' a hawnaah he thu hi Home Minister chuan a sawi a. Home Minister chuan Mizote chu Civil Service leh SSC lamah lut an tlem hle tih a sawi a. Sorkar laipui dawr changa Mizo hnathawk an lo awmin an tangkai thin hle a ni a ti a. Heng service-ah te hian lut an tam theih nan tan tlan a ngai hle tih a sawi a ni.

### **Byte of Home Minister**

Home Minister chuan vawiina a hawn tak, eizawna kawng inkawhmmuhna tur kut, Career Fair chu thil hautak, a buatsaihtu changkan ngai baw k, a rawn kal te thil chik mi leh thil tih tak tak tum nih ngai baw k a nih thu a sawi a. Mi te tana kawng kawhmmuhna hun tha a bial chhung ngei a, Electric Veng Branch YMA ten Career Fair an buatsaih thei chu lawmawm a tih thu leh chhuanawm a tih thu a sawi a. Career Fair-a tel zirlai zawng zawngte chu tum mumal nei chung a an lehkha zir chhoh zel nan Career Fair hmang tangkai turin a chah a ni.



## **DRUGS DESTROYED**

Cheng vaibelchhe khat leh nuai 74 hu ruihhlo an mankhawm te tukin khan Central YMA Hall-ah hal ral a ni.

Central YMA hruaitute'n Akashvani News an hrilh danin tukin dar 8 khan Central YMA Hall-ah Central YMA hnuai ruihhlo do pawl, Central Anti- Drugs Squad (CADS) ten kumin January ni 20 leh May ni 1 inkar chhung a an man tihralna hun hman a ni. Home Minister Pu. K. Sapdanga'n a hman pui a ni.

Home Minister chuan thu sawiin, ruihhlo do kawngah sawrkar leh tlawmngai pawl, a bik takin YMA te thawhhona chu hlawhtling a tih thu leh thlamuanpuiawm a tih thu a sawi a. Sawrkar hna hmun sawma then a hmun kua hi tlawmngai pawlte zar a nih thu tarlangin, Excise Minister-in ruihhlo dona a vei hle chu lawmawm a tih thu a tarlang baw k. Ruihhlo do danah tharum nena bul tana, counselling nena hma lak zui zel chu tangkai a tih thu sawiin, hemi kawngah hian Kohhran pawhin nasa takin hma an la tih a sawi a. He tianga tanho zelna hian Mizo thalaite ruihhlo lakah a chhanchhuah ngei a beisei thu leh hmalakna thar atan khawlai thenfai hnatlang pawh neih leh thuai a nih tur thu a sawi a ni.

Central YMA President Pu R. Lalnggheta pawhin thu sawiin, ruihhlo do kumpulan hnuai a CADS te thawrimna chu chhuanawm a tih thu a sawi a, thalaite tichhetu ruihhlo lakah indo puan a nih thu leh thil thalo laka mahni inven reng a tul thu a sawi a. Ruihhlo tam tak man a ni tawh chu thalaite chhanchhuahna a nih avangin Pathian hruainaah lawmthu sawiin, taima tak leh rim taka an do zel chuan Pathianin hlawhtlinna a la pe zel dawn tih a tarlang a ni. Home Minister in ruihhlo man te tihralna hun a hmang a, a tam zawk hi hmun dangah tihral a ni baw k.

Tukin a ruihhlo tihchhiat tak hi heroin kg 4 bawr vel, ganja gram 49 chuang leh thalaite'n an hmansual clinical drugs thahnem tak a ni a. Tualchher zu um 31 a tel bawk.

<><><>

## **WEATHER**

Indian Meteorological Department Aizawl Director Pu Sudheer Kumar Dwivedi chuan Mizoram pum huapin ruah tam vak lo sur chho tura ngaih a nih thu leh district thenkhatah a tam deuh an rin thu a sawi.

Akashvani zawhna chhangin Pu Sudheer Kumar Dwivedi chuan ruahsur tura an hmuh lawk hi a tam vak lo a, hetihruah hian an khawlin a hmuh danin district pathum Mamit, Kolasib leh Lawngtlaiah te ruah tui a tam hret thei a ti a. Hei bakah thli chak zawng chu darkar khata km 40 atanga 50 vel a nih theih thu sawiin mipuite chu an theih anga fimkhur turin a chah a ni.

<><><>

## **HNAHTHIAL MZP**

Mizo Zirlai Pawl Headquarters Hnahthial chuan vawiin khan MZP Pisa, Bazar veng Hnahthialah khawpui chhunga hnam dang awm zawng zawng te chhiarpui neiin a ko khawm.

MZP Headquarters Hnahthial Executive Committee Meeting 2026-2028 term-a vawikhatna in a lo rel tawh bawhzuiin MZP chuan Hnahthial khawpui chhunga hnam dang awm zawng zawng te chhiarpui a nei a, he hunah hian hnam dang mi 105 chhinchhiah an ni.

Chhiarpui neih rual hian MZP chuan Hnam dang te Inner Line Permit (ILP) an endik nghal a. Hnam dang kalkhawm te chu ILP nei ngei ngei tur leh dan ang taka hna thawk turin an chah a. Mizo te nena tha taka thawhhona nei tur leh midangte tana hnawksaka awmlo turin MZP chuan an chah a ni. MZP chuan tun hnaia Mizo hmeichhe chung a mawi lo taka hnam dang che an hriat thu leh tha lo an tih thu sawiin, Mizo hmeichhiate lakah MZP chu a thikthu a chhe zel dawn tih an hrih a, hetiang thil hi MZP in a hre leh a nih chuan na takin action a la tawh dawn tih an sawi a ni.

MZP chuan hnam dang sponsor-tu te pawh dan dik takin an thawk em tih leh an ILP validity chu ngaipawimawh zual turin an chah bawk a ni.

<><><>

## **PHAWNGPUI CLOSED**

Furpui lo thleng tur leh National Park chhunga nungcha chi hrang hrangte in thlahpun hun a nih chhih avangin Phawngpui National Park chu May ni 1 atanga October ni 31 thleng khar a ni a.

Hriattirna hi Chhimtuipui Wildlife Division Deputy Conservation of Forest chuan tichhuakin nungcha leh sava te ralmuang leh him taka an awm theih nan te leh an mahnia an in siamthat theih nan Phawngpui National Park hi khar a ni a ti a, ramsa leh Nungcha humhalh kawng aj mipuite tawiawmna a ngen tih a sawi bawk.

<><><>

## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

## **REPOLL**

Election Commission thupek angin vawiin khan West Bengal-a Polling Station 15 ah vote thlak that a ni. Vote thlak thatna Polling Station 11 hi Magrahat Paschim Assembly bial chhung niin a dang pali hi Diamond Harbour Assembly bial chhung a ni a. Election Commission chuan Returning Officer leh Observer te zirchianna a enfiah hnuah vote thlak that hi a rel a. Tukin dar 7 atang khan vote thlak niin tlai dar 6 thleng hun hawn a ni a. Hriat theih chinah chawhnu dar 1 thleng khan vote zaa 56 a tla a ni.

<><><>

## **LOK SABHA COMMITTEE**

Lok Sabha Speaker Om Birla chuan vawiin khan kum 2026-27 chhunga Parliamentary Committee tur a din a. Lok Sabha BJP MP Dr. Sanjay Jaiswal chu Member 30 awmna Committee of Estimates Chairperson atan ruat a ni a. Lok Sabha atanga member 15 leh Rajya Sabha atanga member 7 awmna Committee on Public Undertakings Chairperson atan Rajya Sabha-a BJP MP Bajjayant Panda ruat a ni a. Lok Sabha Congress MP K C Venugopal chu Public Accounts Committee Chairperson atan ruat a ni a. Hetihlai hian Lok Sabha BJP MP Faggan Singh Kulaste chu Committee on the Welfare of Scheduled Castes and Scheduled Tribes ho turin Speaker Om Birla chuan a ruat bawk a ni.

<><><>

## **PB**

Prasar Bharati Chairman thar atan Prasoon Joshi ruat a ni. Union Ministry of Information and Broadcasting chuan vawiin khan Pu Joshi hi ruat anih thu a puang a. McCann World group CEO leh APAC Chairman thin a ni a. Pu Joshi hi thu leh hla thiam tak nin kum 2015 khan Padma Shree chawimawina pawh a dawng tawh a ni.

<><><>